



ՀԱՂՈՐԴԱԳՐՈՒԹՅՈՒՆ

Ամենայն Հայոց կաթողիկոս Վազգեն Ա-ի եղբայրական հրավերով 1974 թ. մայիսի 10—15-ը Մայր Աթոռում էր գտնվում բուլղարական օրթոդոքս եկեղեցու Հովվապետ Նորին Սրբություն Տ. Մաքսիմ Պատրիարքը՝ ընկերակցությամբ Ստարա-Ջագորայի միտրոպոլիտ գերաշնորհ Բանգրատիի, Մակարիոպոլի եպիսկոպոս գերաշնորհ Նիկոլայի, Մոսկվայի բուլղարական օրթոդոքս եկեղեցու ներկայացուցիչ հոգեւորնի տ. Նեստոր վարդապետի և բարեշնորհ ավագ սարկավագ դոկտոր Վասիլ Վելյանովի:

Այս առթիվ Մայր Աթոռ էին ժամանել Ռումինիայի և Բուլղարիայի հայոց առաջնորդ գերաշնորհ տ. Տիրայր եպիսկոպոսը և Բուլղարիայի հայոց թեմական խորհրդի ատենապետ տիար Օննիկ Ասլանյանը:

Մայիսի 10-ին Երևանի օդանավակայանում բարձրաստիճան հյուրերին դիմավորեցին Վազգեն Ա. Ամենայն Հայոց Հայրապետը, գերաշնորհ տ. Կոմիտաս արքեպիսկոպոսը և գերաշնորհ տ. Պարզև, տ. Հունիկ, տ. Արսեն, տ. Գևորգ եպիսկոպոսները, ինչպես նաև Մայր Աթոռի պատասխանատու աշխատակիցներ:

Բուլղարական եկեղեցու Սրբազան Պատրիարքին օդանավակայանում դիմավորեցին նաև Հայկ. ՍՍՀ Մինիստրների սովետին առընթեր հայ եկեղեցու գործերի խորհրդի նախագահ մեծահարգ տիար Սարգիս Գասպարյանը և տեղակալ տիար Սուրեն Հովհաննիսյանը:

Երկու Հայրապետները, շրջապատված իրենց հետևորդներով, հանդիսավոր շքերթով ժամանեցին Մայր Աթոռ, ուր Փրկչի Իջման սուրբ սեղանի առաջ ողջագուրվեցին և փոխանակեցին բարիգալստյան ու ողջույնի ջերմ խոսքեր:

Մայիսի 11-ին երկու Հովվապետները Մայր տաճարում ներկա եղան երեկոյան ժամերգությանը, այնուհետև՝ Էկումենիկ աղոթքին և հոգևոր համերգին՝ Մայր տաճարի երգչախմբի կատարմամբ:

Մայիսի 12-ին, կիրակի օրը, Հայոց Հայրապետը Մայր տաճարում մատուցեց ս. պատարագ, որի ընթացքում ս. Սեղանին սպասավորում էին տ. Տիրայր և տ. Գևորգ եպիսկոպոսները ու Մայր Աթոռի հոգևորականաց դասը: Քարոզի պահին երկու Հովվապետները հանդես եկան եղբայրական փոխադարձ սիրո և հարգանքի բարեմաղթություններով:

Ս. պատարագից հետո Վեհարանի գահաարահում, ի պատիվ բուղարահում եկեղեցու բարձրաստիճան հյուրերի, տեղի ունեցավ հանդիսավոր ընդունելություն, որին ներկա էին նաև հայ եկեղեցու գործերի խորհրդի նախագահ տիար Սարգիս Գասպարյանը, տեղակալ տիար Սուրեն Հովհաննիսյանը, ինչպես նաև Երևանի մտավորական հասարակայնության ներկայացուցիչներ և հավատացյալների մի հոծ բազմություն: Ջերմ ողերձով հանդես եկավ Հայոց Հայրապետը, որին նույն ջերմությամբ պատասխանեց բուղարական օրթոդոքս եկեղեցու Հովվապետը:

Ժամը 15-ին Վեհարանի սեղանատանը տրվեց պաշտոնական ճաշկերույթ՝ ի պատիվ Մայր Աթոռի բարձրաստիճան հոգևորական հյուրերի, ուր փոխանակվեցին բաժակաճառեր:

Մայիսի 14-ին Նորին Սրբությունները Իրենց շքամբերով այցելեցին Մեծ եղեռնի հուշարձան, ինչպես նաև բուղար ժողովրդի մեծ զավակ, հեղափոխական-բանաստեղծ Պելու Կ. Յավորովի արձան և զետեղեցին ծաղկեպսակներ:

Տիար Ս. Գասպարյանը, ի պատիվ բուղարական եկեղեցու պատվիրակության, տվեց պաշտոնական ճաշկերույթ:

Նույն օրը Հայկ. ՍՍՀ Միմիստրների սովետի նախագահ տիար Գրիգոր Արզումանյանը ընդունեց Նորին Սրբություն Ս. Ս. Վազգեն Առաքինին, որը ներկայացրեց Իր մեծարգո հյուրին՝ Նորին Սրբություն բուղարական օրթոդոքս եկեղեցու Ս. Մաքսիմ Պատրիարքին:

Երեկոյան երկու Հայրապետները ներկա եղան հոգևոր ճամբարում հյուրերի պատվին կազմակերպված ուսանողական հանդեսին:

Մայր Աթոռում գտնվելու օրերին մեծարգո հյուրերը այցելեցին Մայր տաճարի և Հին Վեհարանի թանգարանները, Վաղարշապատի պատմական վանքերը՝ ս. Հռիփսիմե, ս. Գայանե, Մատենադարան, Գառնի, Գեղարդի վանք, Սևանա լիճ, ս. Մեսրոպի շիրիմ Օջականում և մայրաքաղաքի այլ տեսարժան վայրեր:

Երեկոյան Վեհարանում տեղի ունեցավ եղբայրական տեսակցություն հայ և բուղարական եկեղեցիների Պետերի միջև, ուր գոհունակությամբ հաստատվեց, որ Հայաստանյայց առաքելական եկեղեցու և բուղարական օրթոդոքս եկեղեցու միջև գոյություն ունեն սերտ կապեր էկումենիկ գործակցության ոգով, ինչպես նաև հայ և բուղար ժողովուրդների միջև՝ եղբայրական սնկեղծ և դարավոր բարեկամություն, որը շարունակվում է մեր օրերում, և որի զարգացման և ամրապնդման համար աշխատում են երկու եկեղեցիները:

Երկու Հայրապետները հաստատեցին նաև, որ՝

ա) Եկեղեցիների կոչումն է՝ գոհացում տալ մեր ժամանակաշրջանի այժմեական հարցերին՝ հանգցնել գոյություն ունեցող պատերազմի օջախները, պահպանել և ամրապնդել աշխարհի խաղաղությունը, նպաստել գաղութային ստրկության և ցեղային խտրականության վերացմանը և կենսագործել սոցիալական արդարությունը, եղբայրությունը և բարեկամությունը ժողովուրդների միջև:

Հայ առաքելական և բուղար օրթոդոքս եկեղեցիները ջանքեր են գործադրում այս ազնիվ ասպարեզում՝ գործոն մասնակցություն ցուցաբերելով խաղաղության ազգային կոմիտեներում, խաղաղասեր ուժերի համաշխարհային շարժման մեջ և խաղաղության համաշխարհային քրիստոնեական կազմակերպություններում:

բ) Եկեղեցիները պետք է շարունակեն միմյանց ճանաչել էկումենիկ ոգով, որոնք այն ուղիները, որոնք ծառայում են խաղաղության ու փոխա-

դարձ համագործակցությանը և վկայեն աշխարհի առջև իրենց սերը և հավատքը ի Քրիստոս Հիսուս:

Ցանկություն հայտնվեց, որ փոխայցելություններ լինեն երկու եկեղեցիների աստվածաբանական հաստատությունների միջև, փոխանակվի կրոնական գրականություն, և երկու եկեղեցիների ներկայացուցիչները փոխադարձաբար մասնակցեն մի շարք գիտական-աստվածաբանական հարցերի ուսումնասիրմանը, որ ծառայեր երկու եկեղեցիների միմյանց առավել լավ ճանաչմանը և մերձեցմանը:

Սույն հաղորդագրությունը խմբագրվեց և ստորագրվեց ա. Էջմիածնում 1974 թվականի մայիսի 14-ին:

ՄԱՔՍԻՄ

ՊԱՏՐԻԱՐԷ ԲՈՒՂԱՐԱԿԱՆ
ՕՐԹՈԴՈՔՍ ԵԿԵՂԵՑՈՒ

ՎԱԶԳԵՆ Ա.

ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

